

NOTI-AMBIENTE.

**** Mi querido lector** n conta bay?? Sperando cu tur cos ta "netjie netjie" y cu e weekend aki lo ta uno sumamente ambientoso y e siman lo ta un productivo. Un cordial saludo na e empleadonan di Aeropuerto Internacional Reina Beatrix, muy especialmente esnan di Tax. Awetardi DEN AMBIENTE lo ta di bishita pa un rato, corda bisa esnan para den rij pa hala un banda pa DEN AMBIENTE pasa...

**** Awetardi** DEN AMBIENTE lo sali pa hermana isla Corsow, pa asina cubri y goza di e concierto di Luc Leandry den Curacao Festival Center. E.R.A. y Gibi i Orquesta tambe lo ta den concierto. Giovanni Atalita y Morgan Isenia a duna nos di conoce cu e interes ta grandisimo pa e espectáculo aki, cual sigur lo bay ta un otro éxito pa Mocky Job.

**** Mientras tanto** tambe e expectativanan pa e dos presentacionnan di Claudius y su grupo O.R.E.O. ta grandi na Corsow e weekend aki. DEN AMBIENTE por a tuma nota di un promocion masal sin precedente di e dos presentacionnan di O.R.E.O. na e radio-emisora Z-86. Pues tur cos ta muestra cu O.R.E.O. tambe lo bay cosecha un éxito grandi na Corsow.

**** For di Erin Croes** DEN AMBIENTE por a compronde cu ya e show di Pedro Fernandez otro siman dia 6 di April ta SOLD OUT. Esaki no tabata un sorpresa pa DEN AMBIENTE, ya cu un artista di taya manera Pedro Fernandez, ta ken no kier perde un show di caliber y halto nivel asina, anto den e luhoso Tropicana showroom di Royal Cabana Casino. Esnan cu ta den, sigur lo bay pasa un a n o c h i . . . s u p e r agradable..uno inolvidable..

**** Awenochi** tur cos ta cla pa e prome FIRST YOUTH MODEL CONTEST, cual lo tuma lugar den e ballroom di Wyndham Aruba Beach Resort. E anochi aki ta priminti di bay bira uno sumamente interesante, na unda lo bay participa 25 joven pa e titulo. Informacionnan cu DEN AMBIENTE a obtene for di Ivo Yanez, kende a tuma e iniciativa aki, cu durante e contest lo bay tin tres categoria, principiante den damanan, caballeronan y despues e profesionalnan. E ganador di e principiante den categoria di dama lo ricibi 500 dollar, e caballero 500 dollar y e profesional Mil dollar. E huradonan lo ta consisti di personahenan cu tin amplio experiencia den e mundo di modelahe. Tambe Miss Republica Dominicana lo ta presente como guest-star. E tremendo grupo di baile juvenil Popcorn Dancers lo habri e show. E anochi aki lo ta uno sumamente great pa aprecia cada un di modelonan, expone nan propio fantasia. Tambe nan lo modela den trahe di baño, sportief y di gala. Pues esnan cu mester di vitamina pa nan wowo, ata vitamina pa cura wowo y curazon awenochi den Wyndham Aruba Beach Resort...

**** Tur cos ta** muestra tambe cu awenochi e ballroom di Radisson Aruba Caribbean Resort lo ta "lata lata" pa e festival di canto entre e banqueronan. E siman aki casi tur e bancomaticonan rond di Aruba ta for di servicio. Nan lo ta na servicio te ora cu e ganador di e festival ser menciona. Tambe por a tende cu entre e halto ehecutivonan di diferente banconan, tin bettnan astronomico den wega cu ta papia riba mil florin y cincuenta mil florin. Ta di spera cu esaki no worde paga cu chequen sin

fondo.

**** E siman aki** e candidatanan pa e certamen di Miss Bonaire mester a bishita nos dushi isla turistico Aruba, pero debi cu ningun hotel no a coopera cu e candidatanan, nan no por a realiza e trip pa nos isla. E asunto aki ta di lamenta, ya cu ta trata di solamente cinco habitacion y mas tristo ainda cu ta despues di 18 aña cu Bonaire ta bay eligi su representante pa e certamen di Miss Universe 1996 na Las Vegas. Foei managernan di hotel, e asunto aki ta tristo...

**** For di Iguana Production** na Hulanda, DEN AMBIENTE a ricibi un fax cu ta bisa; Ayeránochí Dushi Band a toca den Brasil Club na Amsterdam y a pone e publico completamente ariba bao. Tabatin un ambiente tremendo den e sala cu tabata completamente yen. No tabatin lugar di pone mas hende, hopi hende cu no por a drenta a keda desapunta den fila. Dushi Band actualmente ta riba un gira di dos siman na Hulanda y nan ta worde representa pa

Iguana Productions. Nan a sera e show di Aruba Dag na Leiden den Groenord Hal, cual a wordo bishita pa 7000 persona. Despues cu Lord Cachete a termina su show hunto cu Orquesta Pegasaya, Dushi Band a resona e calypsonan di Aruba su carnaval 1996. E publico a keda ta blo pa pidi pa mas, pero debi na tempo esaki no por tabata posibel. Dushi Band lo duna diferente presentacion den algun otro ciudad na Hulanda y tambe un presentacion na television.

**** Cosnan ta** pinta di bay bira grandi dia 20 di April den Trappers Club, na unda e refresco di juventud C O C A - C O L A conhuntamente cu Fundacion Sano y Talento lo bay organiza un super BINGO BAILABLE cu SUPER ORQUESTA QUA-SI. Tambe MARIACHI PERLA DI ARUBA lo duna un super show durante pauze. Lo bay tin doorprizenan sumamente atractivo manera un cruise pa dos persona y varios otronan mas. Despues di Bingo e fiesta mes lo cuminsa cu Su-

per Orquesta Qua-Si. Ta algo cu sigur bo no por perde Charlie !..

**** Un noticia** cu a drenta na ultimo hora ta bisa cu RAMPHIS TROMP lo bandona E.Q.O. y lo bay forma parti bek di Super Orquesta Qua-Si. Dialuna awor lo ta e prome ensayo di Ramphis cu Qua-Si, cual lo bay tuma lugar den Aruba Entertainment Center.

**** Mientras cu Ramphis** lo bay forma parti di Qua-Si bek, TATOO lo viaha pa Corsow dialuna awor, na unda e lo bay firma un contract cu DOBLE R pa dos aña. Tatoo defenitivamente lo bay forma parti di DOBLE R y lo bay realiza un gira cu e Reynan di Ambiente na Hulanda.

**** Dialuna** awor CLAUDIUS PHILIPS lo realiza un viaha priva pa Medellin, Colombia, na unda e lo tin cu presenta dilanti President Sampras den su palacio. Claudius a ser invita pa e polemico presidente di Colombia, debi cu e presidente a gusta Claudius su "Boem boem" masha hopi mes.

TRIO ARUBANO RIBA UN SUPER CD ANTILLANO DI MUSICA RANCHERA...



**** Riba foto** nos por aprecia Marcelino Paesch, Edjean Semeleer, y Yolanda v/der Linden den studio di Rainy Juliet na Corsow, na unda nan a realiza nan grabacion pa e super C.D. di musica ranchera. E C.D. aki lo bay marca historia den Antillas y Aruba cu participacion di varios artistanan di renombre Antillano. Keda pendiente pa lansamento di e super produccion aki, cual lo ta muy pronto..